

# Ruutu

## Obhweemero

Ekitabhu kino kiheerwe eriina ryo omukari wuno akubhirikirwa Ruutu, ewe yaari Omumoabhu. Abhamoabu bhayo bhaari abhanyaroobho bha Iziraeri. Erarorekana kubha, eriibhaga riyo hahaabhaho no omwiigwaano muzomu gwe ebhyaaro bhiyo. Eriigano rye ekitabhu kino kina amang'ana gano gakorirwe no okutuuka hano abhataania bhano bhaari bharakaangata Abhiiziraeri (kumyaaka gya 1375-1050 hano Yeesu yaari akyaari okwiibhurwa). Kwiibhaga riyo ekyaaro kya Abhiiziraeri bhaari bhakyaari kukaangatibhwa na abhatemi. Abhataania bhaari abhaatu bhano bhabhirikiirwe na Taatabhugya kubhakaangata Abhiiziraeri kurwaana erihi. Kweeki bhaari bharatina ebhiina bhyaaruru ku Biiziraeri (rora ekitabhu kya Abhataania 2:10-19).

Ameegyo amakuru gano tukwegwa mukitabhu kino ni kubha orubhaango rwa Taatabhugya ni rwa abhaatu bhe ekyaaro kyoosi. Taatabhugya akamutweera ebhite Ruutu no okumutuura kubha omwiibhuri wo okutaanga mukisyooko kya abhatemi. Muyo nimwe Omutemi Daudi akarweera, okumara Yeesu Krisito. Mukitabhu kino, obhunyoohu no obhwiikirirya bhwa Ruutu mukisyooko kyo omusubhe waaye bhuri kubhweero. Kweeki obhuzomu bhwe eheene bhwa Taatabhugya ni okubhatuga abhaatu bhaaye kwiibhaga rye enyaako, no okubhaha amanaga bhano bhaari bharanyaaka.

### **Erimereki, omukari waaye na abhaana bhaabhu bharasaamira Moabu**

**1** <sup>1</sup> Ekare hayo abhataania hano bhaari bharakaangata mukyaaro kya Abhiiziraeri, enzara ekatuuka, ekanyaragana mukyaaro kirya. Na ahaabhaho omuutu wumwe, kurwa mumugye gwa Beterehemu mukyaaro kya Yuuda. Omuutu wuyo akagya kumenya mukyaaro kya Moabu, hamwe na mukaaye na abhaana bhaaye bhe ekisubhe bhabhiri. <sup>2</sup> Eriina ryo omuutu wuyo ni Erimereki, na mukaaye ahabhirikirwa Naomi. Na amariina ga abhaana bhaaye, gaari Marooni na Kiriyoni. Bhoosi bhaari bhe ekisyooko kya Efurate kurwa mumugye gwa Beterehemu mukyaaro kya Yuuda. Bhakahika bhakiikara mukyaaro kya Moabu.

<sup>3</sup> Kyaamwe Erimereki omusubhe wa Naomi akakwa, Naomi akatama mutuumba na abhaana bhaaye bhabhiri. <sup>4</sup> Abhaana bhayo bhakakweera abhakari bha Abhamoabu, na amariina ga abhakari bhaabhu, gaari Oripa na Ruutu. Hano bhaari bhakweeriri bhakiikara na bhamukaabhu kumyaaka ikumi Moabu, <sup>5</sup> na niho Marooni na Kiriyoni bhoosi bhakakwa. Kweeki Naomi akabha akweererwe no omusubhe waaye na abhaana bhaaye bhabhiri.

### **Naomi arakyoora Beterehemu hamwe na Ruutu**

<sup>6</sup> Kyaamwe Naomi akiigwa kubha Taatabhugya abhatweereeri ebhite abhaatu bhaaye bha Iziraeri, abhaheeri ebhyaakurya, ewe akeema kubhanura kurwa Moabu kukoora Yuuda hamwe na abhakaamwaana bhaaye. <sup>7</sup> Akarwa harya yaari akwiikara, akeema kugeenda kukoora Yuuda na abhakaamwaana bhaaye bhabhiri.

<sup>8</sup> Hano bhaari munzira, Naomi akabhabhuurira abhakaamwaana bhaaye bhabhiri, “Bhoono emwe kira owumwe akyoore kunina. Nirasabha Taatabhugya abhahe amazomu, kyeego mwaari kukora amazomu owaane na kubhamura bhaane

bhano bhakuuri. <sup>9</sup>Taatabhugya abhahe orubhaango no obhwiikari obhuzomu kira owumwe abhone omusubhe.” Kyaamwe akabhahuumbata, akabharaga.

Neebho bhakakuura no okutaanga kurira, <sup>10</sup>na bhakamubhuurira, “Aa, etari ego! Turagya twoosi kubhaatu bhaazo.”

<sup>11</sup>Naomi woosi akabhasabha arabhuga, “Bhaakya bhaane, mukyoore yiika! Ni kwaki muntuniire? Muriiseega kubha niratura kubhona abhaana kweeki, bhano bharaabhe abhasubhe bheenyu? <sup>12</sup>Baakya bhaane, mukyoore yiika, kwo okubha enye nikuunguhiri, nitakunagya kubhona omusubhe kweeki. Naabhe naangabhugiri, nirtiisiga kubha nirabhona omusubhe obhutiku bhuno, no okwiihbura abhaana bhe ekisubhe, <sup>13</sup>muungaganyiri tee bhakure bhabhe abhaatu bhagima? Muungatamiri abheene mutabha na abhasubhe? Tiigo, abhaakya bhaane! Nirarora amanaga ga Taatabhugya gatari hamwe na neenye, kweego nino obhururu bhukong’u okubhakira emwe.”

<sup>14</sup>Kumang’ana ga Naomi, kukagirya abhakaamwaana bhaaye bhakataanga kurira kweeki kwiiraka. Niho Oripa akamuhuumbata inyabhyaara waaye, okumara akamuraga no okukyoora owaabhu, nawe Ruutu akamwoomeraku na bhakahirana na Naomi.

<sup>15</sup>Naomi akamubhuurira Ruutu, “Rora, oruuzi omukari omurikyaaazo akyooriri kubhaatu bhaaye na kumisaambwa gyaaye. \* Naawe woosi, okyoore omutuniire omukeebha waazo.”

<sup>16</sup>Nawe Ruutu akabhuga, “Otaniisasaama nikutige hamwe nitige kukutuniirira! Nawe kira hano oraagye, noosi niragya. Na hano oriikare, niho noosi niriikare. Abhaatu bhaazo bharabha abhaatu bhaane, na Emuungu waazo arabha Emuungu waane. <sup>17</sup>Hano oraakweere no okubhiikwa, neenye niho niraakweere no okubhiikwa. Taatabhugya anikorere obhubhi bhukong’u, hano niraatige obhwiirahiri. Kitariho ekigiro kino kiraanagye kututaania enye na naawe, naabhe oruku orweene!”

<sup>18</sup>Naomi hano akarora Ruutu ang’ehiri okumutuniirira eno akugya, akatiga okumubhuurira akyoore. <sup>19</sup>Kweego abhakari bhahhiri bhayo bhakagya orugeendo, tee bhakahika Beterehemu. Hano bhahikiri, abhaatu bhoosi bhe eyo bhakabharuguura, abhakari bhakabha bharabhuga, “Wuno heene ni Naomi?”

<sup>20</sup>Naomi akabhahuurira, “Mutaambirikira Naomi,\* nawe mumbirikira Maara,\* kwo okubha Emuungu mweene Obhuturo Bhwoosi anikoreeri amang’ana gaani kubha amaruru bhukong’u. <sup>21</sup>Hano natanwiri naari ne ebhigiro bhyaaru, nawe Taatabhugya anikyoorirye nitana ekigiro. Kwaki murambirikira Naomi, eraabhe Taatabhugya anikoreeri amang’ana amakong’u, na Emuungu mweene Obhuturo Bhwoosi aninyaakirye?” <sup>22</sup>Kweego Naomi akakyoora no omukamwaana waaye Ruutu Omumoabhu, neebho bhakahika Beterehemu obhusyoori bhwe eriigesa rye eshayiri.\*

### Ruutu arasikana na Boazi

**2**<sup>1</sup>Ahaabhaho omuutu wumwe Beterehemu we ekisyooko kya Erimereki, omusubhe wa Naomi, ne eriina ryaaye ni Boazi. Ewe yaari omuutu omuniibhi no okumenywa na abhaatu bhoosi. <sup>2</sup>Orusiku rumwe Ruutu Omumoabhu akamubhuurira inyabhyaara akiikirira, “Nirasabha kubha reero nigeende

\* 1:15 Abhomoabu bhaari bharaseengera emisaambwa myaaru bhane emirimo hagari.

\* 1:20 Naomi ekeembo yaaye ni *omuzomu*.

\* 1:20 Maara ekeembo yaaye ni *mweene bhururu*.

\* 1:22 *Eshayiri* ni eziimbibho zino zituubheeni kye engano.

kutooratoora amagesa mumuguundu gwo omuutu wuyo woosi wuno ariikiriry nitooremu.”\*

Naomi akiikirirya go omukamwaana waaye akabhuga, “Noogye, muukya waane.”

<sup>3</sup> Niho Ruutu akagya mumuguundu omurebhe, akataanga kutooratoora amagesa inyuma ya abhagesi. Kurubhaango, akatukira kubha arakora emirimo mumuguundu gwa Boazi we ekisyooko kya Erimereki.

<sup>4</sup> Kwiibhaga isuuhu, Boazi akahika mumuguundu harya kurwa Beterehemu, akabhakeerya abhagesi, akabhuga, “Taatabhugya abhe neemwe.”

Neebho bhakamukyoora, “Naawe Taatabhugya akutweere ebhite.”

<sup>5</sup> Kimwe Boazi akamubhuurya omwiimeerereri wa abhagesi, “Omuukya wuno ni wo wowi?”

<sup>6</sup> Omwiimeerereri wa abhagesi akamukyoora, “Omuukya wurya ni Omumoabhu, wuno akaaza hamwe na Naomi kurwa kukyaaro kya Moabu. <sup>7</sup> Anisabhiri kubha atoretore amasaagyo ga amagesa inyuma ya abhagesi mumuguundu muno. Neewe akoriri emirimo gino kurwa etabhoori tee bhoono, niho agiiri kumuunya mukihuuna.”

<sup>8</sup> Niho Boazi akamubhuurira Ruutu, “Muukya waane, itegeerera, awe otagya kutooratoora mumuguundu gwo omuutu owuundi, nawe obhe haguhi na abhabhagati bhaane bhe ekikari. <sup>9</sup> Ore ore omuguundu guno bhakugesha na obhe oratooratoora inyuma. Nibhahatikiri abhamura bhe ekisubhe kubha bhatakunyaakya, na amaanzi gano abhamura bhayo bhatahiri muzisengo zyaabhu, oraabhe ogwaatirwe enyoota, noogye oganywe.”

<sup>10</sup> Niho Ruutu akahigamira Boazi tee haasi, akamubhuurya, “Nibhweenibhwi obhwiikirirya embere waazo? Ndora ondoreeri ebhigoongi, neenye ni mugini?”

<sup>11</sup> Nawe, Boazi akamukyoora, “Nibhuurirwe goosi gano okamukorera nyakubhyaara, kurwa hano omusubhe waazo yakuuri. Na kyeego obhatigiri wuuso na nyoko weenyu ne ekyaaro kyaazo, okabhabhikira abhaatu bhano otaariweenda obhamenya. <sup>12</sup> Taatabhugya wa Iziraeri wuno omuryaariri, akuhe omureembe kugooosi gano okoriri. Taatabhugya Emuungu akuhe orubhaango bhwaheene.”

<sup>13</sup> Ruutu akamukyoora, “Omukuru waane, nirasabha nibhone omweeya embere waazo, kwo okubha osaambaarukiry bhucong’u egoro yaane, ningabha enye nitari kyo omubhagati waazo we emirimo.”

<sup>14</sup> Hano eriibhaga rye ebhyaakurya rikahika, Boazi akamubhuurira Ruutu, “Haguhi hano, nauze orye ebhyaakurya hamwe na neetwe, okorye mumaanzi amatunduru go omuzabibu.” Kyaamwe Ruutu woosi akagya harya, akiikara hamwe na abhagesi, Boazi akamuha ebhyaakurya ebhikarangu, akarya no okusaagya. <sup>15</sup> Hano bhakamara kurya, Ruutu akiimeerera kweeki akataanga kutoora amasaagyo ga amagesa. Boazi akabharagania abhamura bharya, “Mutige yisukiirire no okutoora naabhe muzituumo ziyo, na mutaaza kumurekya.

<sup>16</sup> Kweeki hano mukugesha, mugese ebhigara ebhiindi murabhitiga muzituumo ziyo, muramutigira abhitoore, mutaaza kumurekya.”

<sup>17</sup> Niho Ruutu akabha aratooratoora ebhigara mumuguundu murya tee engoroobha. Akakumania ebhigara bhyaaye bhiyo, akahuura na akabhona eshayiri yino ekwiizurya ekisehi kimwe ekikuru!

\*2:2 Kunyaangi ya Abhiiziraeri mweene omuguundu yaari araha omweeya abhaatu abhataka, abhakaruka na abhaana kutooratoora inyuma ya abhagesi.

### Ruutu arakyoora kuNaomi

<sup>18</sup> Ruutu akiitweeka ekisehi, akakyoora mumugye. Hano yahikiri yiika, akeereky a inyabhyaara waaye amagesa gano atooriri. Kweeki akagega na amasaagyo ge ebhyaakurya bhino yasaagirye hano akiiguta, akamuha.

<sup>19</sup> Niho inyabhyaara waaye akamubhuurya, “Otooriri hayi goosi gano? Waari oratoora mumuguundu gwa weewi? Aguungibhwe omuutu wuno akuheeri omweeya.”

Ruutu akamubhuurira Naomi, “Nikoriri emirimo mumuguundu gwo omuutu wuno akubhirikirwa Boazi.”

<sup>20</sup> Naomi akabhuga, “Taatabhugya amutweere ebhite Boazi, kwo okubha Taatabhugya atatigiri okweereky omureembe kubhahoru na kubhaku.”\* Akageenderera kugaamba kubha, “Omuutu wuyo ni omuhiiri weetu wa haguhi, ni owumwe wa bhano bhakweenderwa kututuga.”

<sup>21</sup> Kweeki Ruutu akamubhuurira, “Omuutu wurya ambuuriri kubha, nibhe hamwe na abhabhagati bhaaye bhe ekikari tee hano bharaamare okuges a.”

<sup>22</sup> Niho Naomi akamubhuurira Ruutu, “Muukya waane, ni kisi okore emirimo hamwe na abhahokya bhe ekikari mumuguundu gwa Boazi, kwo okubha hano oraakore mumuguundu gwo omuutu owuundi, oratura kunyaakibhwa.”

<sup>23</sup> Kweego, Ruutu akagya kubhahokya bhe ekikari bha Boazi no okutooratoora, tee hano bhakamara kuges a eshayiri ne engano. Na Ruutu yaari ariikara hamwe ni inyabhyaara waaye.

### Ruutu na Boazi kurubhuuga rwo okuseesera

**3**<sup>1</sup> Orusiku rumwe Naomi akamubhuurira omukamwaana waaye, “Omuukya waane, ni bhuzomu nikumoheerye wo okukutuga, okubha obhone amazomu.

<sup>2</sup> Boazi wuno waari kuhokya na abhabhagati bhaaye bhe ekikari, ni omuhiiri weetu wa haguhi. Rora, reero engoroobha arabha araseesa eshayiri kurubhuuga.

<sup>3</sup> Bhoono awe noogy e wiisaabhe, wiihak e amaguta gano gakuraangasira, wiibhohe engibho enzomu, ogy e kurubhuuga harya. Kweego otaaza okwiyeereky a amenye kubha ori harya. Nawe, otige tee amare kurya no okunywa. <sup>4</sup> Oore no okumenyeekererya bhuzomu ahagiro hano akuhiindira. Na hano akubha ahiindiiri eziitiro, ogy e waasurye kumaguru gaaye ohiindire hayo. Neewe hano araabhuuke, arakubhuurira ryo okukora.”

<sup>5</sup> Ruutu akamukyoora, “Niragakora gano goosi onibhuuriiri.” <sup>6</sup> Kweego akagya kurubhuuga harya, akakora kyeego inyabhyaara waaye amubhuuriiri.

<sup>7</sup> Hano Boazi akamara kurya no okunywa, akasaambaaruka. Akagya kuhiindira kubhuteero bhwe etuumo ye eshayiri. Ruutu akagya ng’orang’ora, akaasurya kumaguru gaaye, akahiindira imbarika. <sup>8</sup> Hano bhukahika obhutiku gati, Boazi akiikyora no okwiitakya, ho! Akabhona omukari ahiindiiri orubhaara rwa amaguru gaaye.

<sup>9</sup> Akamubhuurya, “Naawe weewi?”

Ruutu akamukyoora, “Enye ni Ruutu, omubhagati waazo. Awe naawe omuhiiri waane wa haguhi. Nirasabha kubha obhe orantuga.”

<sup>10</sup> Boazi akabhuga, “Muukya waane, otweereerwe ebhite na Taatabhugya! Obhuzomu bhwaazo bhwa bhoono kukisyooko kyeetu bhukiriri bhurya bhwo okutaanga, bhuno okamukorera Naomi, kyeego otamohiry e abhamura, bhabhe abhataka hamwe abhaniibhi, nibho bhakukweere. <sup>11</sup> Bhoono ootobhoha, muukya

\*2:20 Naomi akabhuga ego kwo okubha Taatabhugya akabhaha Boazi kubhatuga no okugeendererya obhuniibhi na amariina go omuku.

waane. Nirakukorera riyi ryoosi rino oreende, kwo okubha abhaatu bha mumugye guno, bhamenyiri kubha one teemo nzomu. <sup>12</sup>Yiingabha ni heene, enye ni omuhiiri waazo wa haguhi. Nawe ariho omusubhe owuundi, ewe niwe omuhiiri waazo wa haguhi bhukong’u kunikira enye. <sup>13</sup>Bhoono, awe oganye tee obhutiku bhwa reero, etabhoori hano bhukukya, nirarora omusubhe wuno ariikiriryi kukugabha. Ambe, erabha bhwaheene. Nawe hano araange, nirakuragania embere ya Taatabhugya, enye nirakutuga. Kweego awe hiindira hano tee etabhoori.”

<sup>14</sup>Niho Ruutu akahiindira orubhaara rwa amaguru ga Boazi. Akabhuuka hayo zuri, kwo okubha Boazi ateendiri omuutu wuyo woosi amenye kubha omukari yaari kurubhuuga harya. <sup>15</sup>Boazi akamubhuurira, “Oruusye omweenda gwaazo waarye haasi.” Ruutu akaarya. Boazi akamuha eshayiri yino ekiisuka okwiizurya ebhirengo bhisaasabha,\* akamwiitweekya. Ruutu akakyoora yiika.

<sup>16</sup>Hano Ruutu akuhika yiika, inyabhyaara waaye akamubhuurya, “Muukya waane, amang’ana gabheeribhwi eno waari?”

Akamubhuurira inyabhyaara waaye gano goosi Boazi amukoreeri. <sup>17</sup>Akabha arabhuga, “Boazi aniheeri eshayiri yino ikwiisuka okwiizurya ebhirengo bhisaasabha, kwo okubha akabhuga, ‘Otakunagya kukoora amabhoko bhusa kwiinyabhyaara waazo.’”

<sup>18</sup>Naomi akabhuga, “Bhoono muukya waane, horeera tee orore goosi kyeego garaabhe, kwo okubha omuutu wuno atakuhoreera reero, tee hano araamare amang’ana gano goosi.”

### Boazi akamugabha Ruutu

**4**<sup>1</sup> Niho Boazi akagya akiikara mukisyooko kyo okusikirira mumugye, ahagiro hano abhaatu bhahaasangira. No omusubhe wuno Boazi ahaabha abhugiri yaari omuhiiri wa haguhi bhukong’u wa Erimereki, ewe akahita harya harya. Boazi akamubhirikira, “Omurikyaane, nauze wiikare hano.” Omusubhe wurya akagya, akiikara harya. <sup>2</sup>Kweeki, Boazi akabhabhirikira abhaatu ikumi mubhakaruka bho omugye gurya, akabhabhuurira neebho bhakaaza bhakiikara.

<sup>3</sup>Niho Boazi akamubhuurira omuhiiri waaye wurya, “Naomi akyooriri kurwa mukyaaro kya Moabu eno ahiikara. Bhoono arenda kugurya omuguundu guno gwaari gwo omuhiiri weetu Erimereki. <sup>4</sup>Ambe, enye naari nirarora kubha ni kisi kukubhuurira eng’ana yino. Bhoono eraabhe oreenda omuguundu gwaabhu, oruusye endihi ogugege, na ogaambe embere ya abhakaruka bhano bhari hano na abhaatu bhano. Abhe oragwenda naabhe otakugweenda ohaye bhoono, kwo okubha ona omweeya gwe embere na gwa kabhiri neenye nikweenderwa kugurihira.”

Neewe akabhuga, “Niragurihira enye.”

<sup>5</sup>Niho Boazi akamubhuurira omuutu wurya, “Kweeki omenye kubha eraabhe naawe oraagure omuguundu guyo ku Naomi, oramugabha na Ruutu Omumoabhu omutuumba, kubha wibhurire Marooni ekisyooko kuriina ryaaye na kubhigiro bhyaaye.”

<sup>6</sup>Omuhiiri wuyo akabhuga, “Kubhwiiseegi bhwaane enye nitakunagya kuririhira, kwo okubha nitaaza kusarya engabho yaane. Awe orituurye omweene, enye nitakunagya.” <sup>7</sup>Ne eziisiku ze ekare Iziraeri, hano abhaatu bhaheenda kutuurya hamwe kukirania ekigiro, hahaabha ne ekirengyo kyo omuutu okuruusya ekikweera kyaaye, no okumuha omurikyaaye. Kunzira yiyo bhahaakumiirira eng’ana yo okukirania ebhigiro eyo Iziraeri. <sup>8</sup>Niho

\*3:15 *Ebhirengo bhisaasabha* ni kye ebhisehi bhibhiri.

akamubhuurira Boazi, “Bhoono awe gura omuguundu guyo.” Neewe akarusya ekikweera kyaaye akamuha Boazi.

<sup>9</sup>Boazi woosi akabhabhuurira abhakaruka na abhaatu bhoosi bhano bhaari harya, “Emwe, reero mubheeri abhiimeerereri bho okumenyeekererya kubha, muruuzi niguriri ku Naomi bhyoosi bhino bhyaari bhya Erimereki na abhaana bhaaye, Marooni na Kiriyani. <sup>10</sup>Kweeki Ruutu, Omumoabhu wuno yaari omutuumba wa Marooni, kurwa reero woosi nimugabhiri abheeri omukari waane, kwo okubha niigo turaabhe no obhuniibhi bhwe ekisyooko kyo omuku okubha eriina ryaaye ritabhura mubhaana bhaabhu, na mukisyooko kyo omugye gwaabhu. No orusiku rwa reero, emwe ni abhiimeerereri.”

<sup>11</sup>Na abhakaruka bharya na abhaatu bhoosi bhano bhaari harya bhakagaamba, “Ni heene etwe ni abhiimeerereri. Taatabhugya amukore omukari wuno askire muwaazo abhe kya Raheeri na Reeya, abhabhiri bhayo nibho bhoombokiri enyuumba ya Iziraeri.\* Awe obhe omutu we ekiniibho mukisyooko kya Efuraati, no okumenyekana mumugye gwa Beterehemu. <sup>12</sup>Taatabhugya akuhe orwiibhuro omukari wuyo, kubha ekisyooko kyaazo kibhe kya Pereesi, okurwa orwiibhuro rwa Tamaari na Yuuda.”\*

<sup>13</sup>Kweego Boazi akamugabha Ruutu, akabha omukari waaye. Taatabhugya akamutweera ebhite Ruutu, akaritoha, akiibhura omwaana we ekisubhe.

<sup>14</sup>Neebho abhakari bho omugye gurya bhakamubhuurira Naomi, “Aguungibhwe Taatabhugya wuno akuheeri omuhiiri wa haguhi wo okukutuga! Neewe abhe omukuru wuno amenyekeeni mukyaaro kya Iziraeri. <sup>15</sup>Omwaana wuyo arakutuga mubhukikuru bhwaazo, kwo okubha yiibhwiirwe no omukwe waazo omukuseegi. Ruutu azomeeri kukira abhaana bhaaru bhe ekisubhe, niwe amwibhwiri.” <sup>16</sup>Niho Naomi akamugega omwaana wurya, akamuhuumbata, akabha omureri waaye.

<sup>17</sup>Abhakari abhanyarobho bhakamutoga omwaana wurya eriina ryaaye niwe Obeedi. Bhakabhuga, “Naomi abhweeni omwaana we ekisubhe!” Kyaamwe Obeedi akamwiibhura Yeese, na Yeese akamwiibhura Daudi.

<sup>18</sup>Runo nirwe orwiibhuro rwa Pereesi:

Pereesi akamwiibhura Hezirooni,

<sup>19</sup>Hezirooni akamwiibhura Raami.

Raami akamwiibhura Aminadabu,

<sup>20</sup>Aminadabu akamwiibhura Nasoni.

Nasoni akamwiibhura Sarimooni,

<sup>21</sup>Sarimooni akamwiibhura Boazi.

Boazi akamwiibhura Obeedi,

<sup>22</sup>Obeedi akamwiibhura Yeese.

Yeese akamwiibhura Daudi,

wuno akabha omutemi wa Abhiiziraeri.

\* 4:11 Rora Mwanzo 35:23-26.

\* 4:12 Rora Mambo ya Abharaawi 2:4-11. Pereesi yaari zaazi wa Boazi.